

Gij Rengzmbe Sengmingh

上林县大丰镇中心学校 四(2)班 杨逸晨/Yangz Yicinz

Gou gingciengz gag naengh youq laj cueng, gag caemsim naemj, gij eiqngeih sengmingh dwg gijmaz ne?

Ranz gou ndaem miz go daejhaiz ndeu, godaejhaiz sengmingh giengz rengz, mbouj lumj gij dujva neuznet. Geiq ndaej miz baez ndeu cuengqgyaj, gou caeuq daxboh daxmeh itheij bae dieggyae lijyouz, dangseiz bae gip lai, mbouj ndaej hawj godaejhaiz rwd raemx. Dou bae le cib geij ngoenz, gou laihnaeuz bat godaejhaiz dairoz lo. Byawz rox dou dauqma, de lij lumj gaxgonq ityiengh heuswd. Gou danqhaenh gij sengmingh godaejhaiz giengz rengz, mbouj miz raemx de hix ndaej lix roengzdaeu.

Miz ngoenz ndeu, gou bae ndaw gunghyenz guhcaemz, baez yamq haeuj diegnywj, sam duz mbungqmbaj sikhaek mbin hwnjdaeu, gyoengqde humx youq itheij, doengzcae z diuq foux, daih dwggyaez lo. Gou gimq mbouj ndaej gaebdawz duzmbaj ndeu, neix baez yungh rengz couh dawz aendungx de nyaenj vaih lo, gij raemxloeg lae okdaeu. Gou laihnaeuz de dai lo, couh dawz de vit bae, hoeng de ngamq liz

fwngz gou couh yungh rengz mbin hwnjdaeu, mbin daemqdet doek roengz duj va golinzgaeq bae, dingz youq gwn dujva lo. Gou mbouj gamj caiq gaemh de lo, naengh roengzdaeu, dauq-ngeix saeh daxbaenh. Gou naemj, gou ra daengz dapanq vwndiz: Sengmingh couhdwg giengz rengz lix youq.

Boux cozgyah Daizvanh Hing Linzswj, hix dwg boux vunz ndiepgyaez sengmingh, insik sengmingh. De cibngeih bi couh baenz cungj bingh heuhguh funghsizing gvanhcezyenz, daengx ndang gvanhcez cungj deng vaih lo, hengzdoengh mbouj bienh. Hoeng de lij genhciz sij le 40 lai bonj cozbij mizmingz, ndaej bingzguh “Daizvanh boux vunzcoz maenhndei mizmingz ndeu(gungh cib boux).”

Gou rox lo, gij eiqngeih sengmingh couh-dwg rengz giengz lix youq, mbouj dingz mbouj duenh. Nanzdauh mwngz mbouj siengj hawj sengmingh shwgeij gyalai saekndei ma? Vaiqdi hengzdoengh ba.

(lauxsae son'gyauq:Mungz Cwngzgen/蒙成建)



Mboengq Daxmeh Bae Gizgyae Guhhong

Meh ha, mwngz okbae gizgyae guhhong, ngoenz-ngoenz cungj angq lai, dwg lwi?

Wgo, gou rox le, meh ngoenzngoenz cungj angq lai.

Aenvih haemh doekgonq meh ok ranz bae gizgyae couh doiq gou naeuz: “Lwg ha, gaej gag bae henz dah caemz raemx bw, langhnaeuz gou mbouj gag bae henz dah guhcaemz le, meh couh hoznet lo, meh couh angqfaengz lo.” — Meh okbae gizgyae guhhong daengz ngoenzneix, gou mbouj bae henz dah caemz raemx saek baez nauq; mbouj dwg lwg mbouj siengj bae, dwg aenvih lwg yaek hawj meh hoznet, hawj meh angqfaengz.

Meh ha, meh okbae gizgyae guhhong, ngoenz-ngoenz cungj angq lai, dwg lwi?

Wgo, gou saeq, meh ngoenzngoenz cungj angq lai.

Aenvih, banhaet ngoenz meh okbae gizgyae guhhong de, gou daejnga'nga nanznanz bae, boh naeuz: “Lwg ha, gaej daej lo, mwngz baez daej, meh youq baihrog guhhong couh mbouj hoznet mbouj angqfaengz lo.” — Ngoenzde meh okbae gizgyae guhhong daengz ngoenzneix, gou mbouj daej gvaq saek baez bw. Ngoenzlwenz, gou mbouj re deng mbawem gat lwgfwngz, in yaek dai bae, lwed cungj okdaeu liux, gou cungj mbouj daej nauq— aenvih lwg yaek hawj meh youq gizgyae guhhong goj hoznet goj angqfaengz bw.

(Daj《Bonjsei Sim Lwngyez》(Veiz Gizlinz raiz) senj okdaeu, Luz Fwncangz/卢奋长 hoiz)

Doj Mou

Baez siengjdaengz duz moubiz iq ranz yahdaiq, gou couh dingj mbouj ndaej gag riu lo.

Ranz yahdaiq baihlaeng ranz ciengx miz duz moubiz iq ndeu, aen ndang de luenzlulu, youq baihlaeng hauhou de, miz gij caekmbanq ndaem lumj baenz duj baenz duj vamoiz, dwkgyaez dangqmaz. Baez daengz ranz yahdaiq, gou cungj bae doj de.

Ngoenz de dwg banringz ngoenzlijbai, daengz ranz yahdaiq, gou mbouj gangj gijmaz, couh beng dahcej bae doj duz moubiz iq. Daeuj daengz laj gyaq makit, cingq raen duz moubiz iq ngaemj gyauej gwn doxgaiq, gou raen henz riengh mou daengj miz gaiq nyangibaet ndeu, cou swnh fwngz gaem hwnjdaeu, caegcaeg iet daengz gwnz gyauej duz mou iq, fwt dwk ret le ret rwz duzmou, liuxle mbouj hawj de yawjraen gou fwt maeuq roengzdaeu, ndoj youq gok

ciengz. Duz mou iq bei le bei rwz, lumjnaeuz gangj: “Boux yakrwix lawz loengh gou?” “Gangj” liux youh ngaemj gyauej gwn “ngaiz” lo. Raen duz mou iq mbouj wj gou, gou youh soengz hwnjdaeu, baet le rieng mou iq mbat ndeu, duz mou iq baet le baet rieng, bak “hwng hwng” geij sing, vanzlij mbouj wj gou. Gou gietdingh caiq doj de mbat ndeu. Gou iet nyangibaet gvaqbae seiz, duz mou hozhwnj lo, de aj aenbak raezrangrang de, gaemz ndeu couh haeb dawz gaiq nyangibaet, daz haeuj ndaw cauzmou bae, lij lumj gwn van gwn diemz dwk nyaij hwnjdaeu. Boihseiz la, gou simvueng le haenq hemq: “Cejbuij, cejbuij, mou gwn nyangibaet bw!”

Dahcejbiuj dingq liux buet gvaqdaeu, mbouj guenj gijmaz, yamq hung ndeu yat baenaj, hamj gvaq gaiqgiemx, gaem dawz nyangibaet couh beng ok baihrog daeu, hoeng deng duz mou iq baez fid, fid haeuj mbiengj wng bae, gij yiengh neix, riu mbouj ndaej, daej mbouj baenz. Dahcejbiuj sim mbouj fug, soengz hwnjdaeu, yemj din siengj byaij haeuj gyawj duz mou iq, byawz rox, duz mou iq caz rox “cingzvang vunzdig”, ngiengx gyauej dox-dauq, fozfoz cung daeu coh cejbuij, dah cejbuij lau dwk gipmuengz doiqlaeng, daej lej hemq hwnjdaeu: “Yahdaiq, gouqmingz ha, duz mou iq haeb vunz la!”

Yahdaiq nyi le couh daeu, hai sing hat, gyaep duz mou iq deuz, beng cejbuij okdaeu. Yahdaiq rubrub gyauej cejbuij, riu naeuz: “Lwg bamz, duz mou iq mbouj haeb vunz, de doj mwngz guhcaemz ndwi!” Gou bekfwngz hemq naeuz: “Dah cejbuij deng mou haep lo!” Dah cejbuij hix riu lo.

Gienh saeh neix yienznaeuz gvaq haujlai nanz lo, hoeng gou baez ngeix daengz, cungj riu oksing bae.

(Liuz Swjyangz)

